



السبت 20 أبريل 2013 12:04 م

هيثم سعد

و مع بداية ليلة من خير ليال الله ، ليلة الجمعة ، تتعالى آلام المخاض ، و تشتد ظلمة الليل ، و تبتهل القلوب قبل الألسنة لله ، أن يفرج الله الكرب ...

و فى مرحلة فاصلة ، و مفترق طرق ، يأبى القضاء إلا أن يكون لسان حاله " القضاء يريد إعادة النظام " تشتد ظلمة الليل ، و يقترب وقت السحر و يزداد الألم ، و تعبس الوجوه!

تذهب للمشفى ، يخيم الصمت على المكان ، و لا تسمع إلا همس السكون! يريح قلبك صوت المنشاوى مبدعا فى قناة المجد ، و يتعبه صوت زوجتك تئن من الألم!

و يأتى الطبيب على عجل و يقول بعد فحص الحالة ، الولادة مش قبل 4 ساعات! - طيب و الألم ده يا دكتور ؟ - ده طبيعى جدا ، و إنت عاوزه يجيى بالساهل كده ؟ يرد الدكتور فى هدوء!

- طيب إيه ، هو القضاء مش ناوى يجيبها البر ؟ ده الثورة بقالها سنتين! - معركتنا مع القضاء مش ح تنتهى من يوم و ليلة!

طيب يا دكتور ، مش ممكن يبقى تدخل جراحى ، ولادة قيصرية يعنى! التدخل الجراحى فى الوقت ده مش فى صالح الحالة خلىنا نمشى طبيعى و الأمور تاخد وقتها ، الزمن جزء من العلاج!

يبدأ قرآن الفجر شق الصمت المطبق على المكان ، تبدأ أنت بصلاة التهجد و الإبتهال فى الدعاء لزوجتك ، و الدعاء على القضاء ، فساهم الليل لأ تخطيء - هات لنا الحقن دى و البرشامة دى

- طيب دول لإيه ؟ الحقن مفيدة لتليين الرحم ، و البرشامة لتسريع " الطلق " .

- بعض القرارات الإستثنائية مهم و يأتى بفاعلية ، فالأمر أصبح على المحك ، و لا سلطة فوق الإرادة الشعبية! هكذا تفهم من قرار الطبيب (الحقن و البرشام) ! - تصلى الفجر ، و ترجع لوردك ، فتلامس قلبك آية " و لو أن أهل القرى آمنوا و اتقوا لفتحنا عليهم بركات من السماء و الأرض " ..

ألمك أنت يصبح فوق الإحتمال ، تتصل ببعض الإخوة ليشاركوك ، فمن حقك عليهم و واجبهم تجاهك ذلك بعضهم هاتفه غير متاح ، بعضهم يرد ح أجلك بعد الصلاة ، بعضهم مسافة السكة يكون عندك ، مش بس كده لأ ، ده جاى و معاه فلوس و يقسموا عليك تأخذها منهم

عادى جدا إن الخليج يحاول يدعم الثورة المضادة و بعض المحسوبين على الثورة اللي مش مضادة يدعمه ضدك

و عادى جدا إن بلد ما تقول إنها ح تدعمك و ماتشوفش وشها :-)

و عادى جدا إن ليبيا و قطر يدعموك لإنهم شايفين إن نهضة مصر نهضة ليهم! مش علشان حصتهم فى قناة السويس!

دلوقتى ممكن نبدا الولادة ، يقول الدكتور فى بشر!

تتسارع ضربات قلبك أنت! يمر أمامك شريط احداث أكثر من عام و نصف (فترة الخطوبة و الزواج)
عينك معلقة بباب غرفة العمليات!

والدك يحاول أن يشد من أذرك ، والدتك تتجه نحو القبلة لتصلى لله ركعتين ، والدتك الثانية (حماتك) لا ينفك لسانها عن ذكر الله

يقطع حبل تفكيرك صوت صرخات الطفل إيذان منه بميلاد جديد ، من وسط الألم
تسجد لله شكرا ، فظنك بالله أن الله ودود كريم حليم رزاق ، ظنك بالله خيرا ، ظنك بالله أن يريد الخير لهذا البلد! و ستنتصر الثورة

قل بفضل الله و برحمته فبذلك فليفرحوا هو خير مما يجمعون

هوامش

1- أسميت إبني " نزال "

الله أسأل أن يجعل له نصيبا من إسمه

2- أى متابع يرى إسقاط لحالة المخاض و الولادة على الواقع السياسى فده من خياله هو و ليس لى دخل به

3- شايف خمسة سبعة ثلاثة إثنين بيسألوا على العقيقة ، أقدر أقول لهم إن العقيقة مش قبل القرارات الثورية الخاصة بالقضاء